

四庫全書

集部

欽定四庫全書

古歡堂集卷六

戶部侍郎田雯撰

七言古詩

移居詩

東野家具少于車學打僧包何為家一捆亂書十瓦鉢
奚奴負走如犇麇小巷偏塞通破寺鄰人指說來官衙
自操箕帚埽土銼糊窗吹紙西風斜雨淋屋塌堆瓦礫
牆腳殘立山薑花日暮天寒驗霜信匝飛禿樹啼老鴉

短檠無油月相照二更三更城鼓過魚目鰓鰓睡不睡
直從萬古尋羲媧

水部田綸霞先生畫省望郎金閨貴客門高京兆風
流題柱之才班窳虞衡瀟灑含香之彥風檣陣馬詩
追韓愈之恢奇鐵畫銀鈎字笑羲之之姿媚東華休
沐之暇庭鮮雜賓西曹退食之餘門多好事然而一
官落落竟無百花潭上之莊八口搖搖何來萬里橋
邊之宅相逢詹尹惟話卜居不遇伯通誰為賃廡鹽

瓶醬甌頻戛觸於宣武街前豚柵雞棲幾轉徙於崇
文門外每因賒酒慣惱隣翁只為擔書恒吁老僕此
烏飛三匝先生既自起而朝鷓借一枝衆客亦同聲
以賦也僕有狂言聊為善謔莫因數溷便掩柴荆縱
使三遷寧迷巷曲但得半弓隙地亟令阿段以栽花
矧逢九月涼秋須遣長鬚為種秫君其無怒僕尚能
來倘詢釀進請看和韻之詩若論為歡且出售文之
直聊題數語並示同遊

陳維崧

田郎詩格如雪車昨來新句傳移家夢向漪亭坐秋
水蒼筤萬箇眠麝麈冬官事少蹋壁臥日未卓午先
放衙殘書滿前自穿穴紛如雁字風中斜未少沈范
相賞識風亭月觀吟梅花廬如蝸牛足搖膝畢逋愛
伴城頭鴉鷺鳥累百詎比數蹠躅聊試終參搗牽蘿
補屋絕代子慎莫無匹悲媯媯 王士禎

載書何必三十車牽船住岸今為家才雄官冷耽坐
嘯身隨鴻鷺心麈麈避喧狹巷僦茅屋虛檐煖處安

蜂衙藥臼茶鐺足位置天然曲几容橫斜犢鼻偏嗤
南阮富俸錢少買東籬花牆短遠山見秋色那無深
柳堪藏鴉滑稽暫爾金門隱佯狂羞作漁陽搨幾輩
朋來競高唱不妨鼓瑟驅靈媧 施閨章

東隣跛象牽雙車西隣官冷頻移家門外草深藏鬼
火牆頭雨壞窺山麇六鰲鼎屨工破碎問誰蓬戶誰
高衙老屋歸然良不惡疎籬一任風吹斜有時舴艋
送白墮可無吟眺酬黃花點綴長空景幽細晚紅天

色三兩鴉拍張暫學鸚鵡舞夔牛霜重還操搗久欲
從君徵僻事圓蓋果否勞女媧 曹貞吉

曉碾霜屑推笨車先生借地今何家街西繚垣乍墁
堊隣人稍聚如麇麇又聞寒榮好慈竹兩行疎柳同
排衙窗壁冰油裹藤角勁風錯迂迴帷斜指麾局室
設麇几別置土簣藏松花香緘綵攢足鉛槧秦皮墨
蹟青於鴉官閣有時召詩客斫鮮擊鼓周摻搗投我
佳吟發逸響五十絙瑟搗靈媧 林堯英

田郎改築懸櫟車索綯葺茨同山家南榮兩廂立短
柵萍可飼鶴莎飼麋借問何以得幽曠水曹無事休
朝衙西望香山隔牆角千尖萬尖雲袂斜遂慕清景
寄寒竹破眼艷艷叢節花君才十倍頗驚衆坐飛虎
僕揮青鴉我如江鼓久喑啞手無蜀木寧堪搗讀君
新詩鍊山骨直窮天巧追皇媧 又

地軸忽脫搖天車天街十家顏九家黑雲撲地路人
竄彷彿獵火驚麇霞布帷毳帳爭露宿縱橫席舍誇

官衙田郎骨鯁擬壁立老屋亦逐西風斜卓錫容膝
那易得相尋絕類優曇花朝來賃廡構精室笑聲啞
啞驕啼鴉小奚負書隸負甕鼓勇不待相鞭撻便可
布席召白墮不煩調瑟呼靈媧 汪楫

牛腰書卷堆驢車壯觀那似貧人家卜居何苦入深
巷潛藏幽僻如麈麈掃堦不許蟻行垤開軒正見蜂
排衙木魚粥鼓沸僧舍幡幢隱約隨風斜布囊早糴
太倉米膽瓶閒插東籬花篝燈熒熒照無寐攤書夜

讀驚棲鴉昔人行事不稱意便舉如意空中搗耽心
古淡亦可笑娛神何處尋靈媧 曹禾

京兆有書克幾車口嗜異味如子家橫身藝苑肆遊
獵怒驅快馬追麇麇冬官邇來罷營建日色未午先
放衙新移小屋在深巷窗戶且免東西斜手齊亂帙
但高枕屋角艷艷東籬花回憶溟渤巨鼇動一舟掀
簸隨神鴉即今將身出逆浪安穩儼聽回帆過且買
雉兔試一割燎毛燔肉追羲媧 汪懋麟

斑斑蘭蘭薄笨車西曹老子新搬家忽逢柴車塞衢
術萬牛蹙踏喧驚廩城門且開誅蕩蕩怪底偏側踰
彭衙竹爐瓦銚響戛觸亂書破硯堆欵斜葛洪移居
絕類此那得水部官梅花若將此景上圖畫只少鮑
姑雙髻鴉先生大笑復何恨我狂尚慣漁陽搨祇愁
秋雨井又塌補天但願煩女媧 陳維崧

道南道北書一車田郎與我齊移家月俸雖分五斗
米相呼野性同磨麩濁醪盈盃注涑水煖湯濯足歌

彭衙風簾無額星炯碎短牆縱葺仍天斜窗前喜有
兩棗樹凝想滿眼他時花誦子山薑詩句爽有若暝
坐翻金鴉盤空硬語和未穩月黑漏鼓齸齸搗布衾
不睡我亦爾牽牛獨處嗤媯媯 朱彞尊

九日同其年升六舟次蛟門石林集黑龍潭和韻
黃桑白楊響不歇老龍貪睡寒湫沒撥杖登高俱半醉
那惜青鞵與布屨詎排佳客非孤斟撐拄枯腸飽糠覈
諸公食豕如食人媿我避俗侶避蠲枳櫪一徑到古寺

青紅兩壁閃靈闕
頽虬山精連鈴旗
訶殿神官擁鬼卒
高臺行酒久狼藉
狐鼠盡出攫肴核
烏鴉在樹蝙蝠飛
西山疊髻蒼鷹措
野曠不慮捏地軸
夜清豈憂見天字
乞兒綽板比伶唱
廟巫鶻冠學官謁
薄寒可畏借一裘
寬杯難數辭百罰
撞鐘吹螺聞城南
瓦雀格磔朔風發
街泥没胫天昏黑
不歸途有關柝
許秋水葦花自颯爽
晚山夕春太超忽
欲向澄潭照鬢髭
迴看戍樓番戟戩
寄爾龍杖雨多
且抱頷珠伏其窟
風氏小園探怪松
糾纏鐵幹地十笏

西隣棗樹

西隣棗樹搖露梢寒宵夏觸如吹筴過牆乾葉不脛走
亂投屋上三重茅前月簾簾垂朱實大似橘柚新擘包
誰遣兒童酸打盡風吹喬棘空枝交忽憶鄉園此時節篋
籃無數來村郊木奴千頭那足數雜以梨栗煎瓜炮冬官
嚼噉不稱意日飽籠餅槃無巢霜威折綿北地冷夕蟲動股
鳴堂切憔悴幾嗟漢南樹涼暑思煎粘日膠傍檐烏尾向人
掉入夜柳瘦連林敲隔屋聽者三歎息如此長夜何叟叟

正月

正月無日無風霾沙黃霧黑連書齋閉戶搖膝蒙被臥耳根寒
熱如疴痲撐腸半飽太倉米垂涎愁過新豐街長鬚倚檐燒土
銼老槐纏榦當空堦凌晨退食來城闕大官呵殿肩相排笑着
面上滿塵土朱鉛塗抹疑優俳衆鬼抑揄爭道路羣兒滑稽多
詼諧腐儒迂拙不解事杞憂兀坐鮮好懷縱橫卷帙堆几案彊取萬
古為同儕祿祥取驗五行志或云乾封農事乖如此春信非宜有連
年馬槊紛楚淮安得好雨知時節原隰草木霑根荻雖鷺乳燕

二三月搨擋布襪兼青鞵藍尾一甌出城去香山澗曲桑乾涯

題周生臨黃庭卷後

我昔曾摹官奴帖來禽墨本臨邑傳十指如椎筆如杵
有鬼苦踞秋毫顛扇面屏幃浪塗抹家雞野鴛紛來前
人嗜我書忘其醜好色豈必傾城妍龍鍾字勢同瘠竹
手腕僵勁非昔年閉門客謝管城子雞毛不費三銅錢
冰簟藤牀伸脚臥老研久作支頭甄周生墨妙師逸
少青鴉搗就黃庭篇麥光大紙長十幅吳蠶密楷風

雷纏臨池絕技有如此摩挲三日思飛騫我觀君書痛
自改鞞材搜取非無權石底老蠹決不可從今三疊仍
三湔

贈任希庵侍御

任子鍵戶停朝餐食書穿穴同白蟬傲屋半破在委巷
竹罌石鈿花叢龕拭几掩映北榮竹開軒吐納西山嵐
屏跡蕭閒守微尚臨池衆妙從幽探上下晉唐歷千載
鍾傅右軍楮河南陳倉金石購古帖硬黃薤本何耽耽

澄心堂紙廷珪墨案上狼籍心饒貪漏痕蠅尾折釵股
解衣磅礴風雨酣須臾楷法變一格數行縝細如春蠶
馬陵夜黑飛萬弩天女屋角投優曇何論臣法二王法
但有第一無第三馮陵大叫更奇絕牀脚黠潘餘雙甌
郊寒島瘦我可厭鸞飄鳳泊君何慚摒擋過從較腕力
苦乏健穎如長鋏只合快雪時晴夕拚傾斗酒來擘柑

丹陽津亭觀延陵墓碑歌

曲阿之西勾曲東江波層疊飛江鴻長年三老老解事

艤船上岸來匆匆延陵墓碑在蒲葦犖确埋沒泥甃中
上鋟兩行岫嶺字下插千尺蛟龍宮摩挲箝口但拱立
異物呵護神鬼攻定哀年代獲麟筆突兀片石撐青空
軒頡冰斯那足數人間萬碣齊發蒙大歷十載殷氏手
摹搨硬本何其工糝糊癡胝脫殼殼縱橫錯落纏蜺虹
點竄微詞季札死考徵僻事方朔窮採藥掘薇厥德讓
子臧大義摩蒼穹後之作者龍門史世家列傳將無同
負鼈盤螭不飛去河崖崩壞斜陽紅打鼓開船行數里

犇牛酒店如新豐鴨嘴蓬牕濕細雨鳶村石屋搖秋風
不眠夜以指畫被渾茫莫記頭冬烘

登采石磯太白樓觀蕭尺木畫壁歌

太白樓上江風寒采石磯下波連山長康不作僧繇死
何人攫弄秋毫端力挽萬牛嘯兩虎袒衣跋扈青冥間
四壁四山拔地起直從十指生烟巒峩眉匡廬兩對峙
西華東岱同躋攀巨靈夸娥日月走坤位乾竇神鬼盤
屋角雷雨勢飛動牆根澗壑聲潺湲牛渚白紵如蟻蛭

天光破碎滄溟寬
藍陳蕭憚稱大手
前追董巨凌荆關
尺木老人更奇絕
身駕大海騎虬鸞
秋來放眼忘遠涉
憑陵萬里開心顏
寺徑濛濛松杉雨
蘆花漠漠龜鼉灘
顧盼無人相娛賞
高呼波底青蓮還

皖城西拜山谷老人墓

試士

長風沙口木葉黃
大江遶郭流湯湯
三橋坂北紅鶴砦
涪翁墓在瀟山岡
松枳蒼蒼路犖确
埜烟漠漠狐狸藏
摩圍老子洪都住
溪園十畝雙井塘
何年遊皖遂不返

石牛精舍來僮伴司空天柱紛在眼羅隱元放羣相將
追昔黨禍邁章蔡宜州儋耳同心傷幾欲買田清潁尾
風壚煮茗西湖菊蘇門詞傑晁秦輩斑斑熊豹非尋常
公才乃如大國楚曹鄮淺陋難頡頏我來思識古人面
寒飈吹下芙蓉裳吟魂剪紙招不出四山雲氣空茫茫
秋林紅壓千頭橘江船白跳八尺鯨酌酒再拜日已夕
秋風突兀摩青蒼

濠梁古寺詩

濠梁古寺城北隅楊花李花三五株殿瓦昔耶啄鳥雀
牆陰叢棘奔鼯鼯一僧頭白老宮監當門拄杖隨兩雛
開元天寶縱談柄偏袒右肩如操觚堂上颯颯毛髮動
風雷拔地神鬼呼面頰七十二黑子紅羅衣下青珊瑚
云是滁陽舊遺像鐵冠指說常人殊王者不死今已死
千載英雄悲寄奴二百七十餘年事羸顛劉蹶長嗟吁
江淮楚泗皆戰地鍾山虎踞稱留都再傳靖難戎馬作
金川之役胡為乎洪熙宣德實令主西漢文景言非誣

二正徼偉國未喪世廟神廟無良圖自熹至懷勢莫掇
社稷遂不延斯須大事輕擲閣寺手王汪劉魏刑餘徒
奪門議禮總多事三案藤葛何其愚高煦宸濠不足怪
強燕自昔貽規模孰謂東林無君子激成黨禍真腐儒
我觀遺像增太息陳跡憑弔行春蕪勝國史材豈易得
今之作者誰董狐倒垂馬撾上馬去落花撲地沾泥途
一路風吹袷衣冷夕春在樹鳴畢逋

題顏修來小照

欽崎磊落顏司勳我曹十子子不羣子才上上我下下
千夫握齧徒紛紛葉林汪王宋曹謝衆妙固無猶與薰
鐘鏞不作瓦缶響彈壓百怪須雄文子詩富強似晉楚
邾莒割據難平分巧匠山骨駕韓愈搖筆白練追羊欣
誰為寫圖坐怪石黑髭紅頰如微醺大腹便便脫巾韞
溪聲湍激耳有聞松樹鐵皮禿其頂犖确山路通江濱
鬢髻奴子抱琴立蒲桃古錦盛桐君彈到履霜第二段
起搜汲冢兼皇墳自夏徂秋秦淮岸風亭月觀花氛氲

杜牧癡狂愛小妓人家席上呼紫雲翻怪此圖太寂寞
何不並繪雙紅裙我返句曲只百里茅岡起伏隨斜照
短衣快馬獵雉兔鞞鷹在臂重十斤箕帚官廨待晨夕
燎毛燔肉烹青芹年來行役江南北鬢鬚衰白勞骨筋
京口渡船一相送三山經眼心殷勤子入春明直歲杪
郊廟金蕤天葩芬寄語數子各努力詞場跋扈同張軍
彈壓百怪
用廬陵句

毆瘡

昌黎作譴瘧鬼詩輜輳贈瘧以好辭我今毆瘧須蚤避
不則重譴休嗟咨句曲四山多猛虎檄牒食汝俵不饑
茅頂神官足妖怪重加雷火輕灸答乖竈尚可割左耳
詛符針灸黃冠兒朱亥裊植豎毛嬪木客俛首瞑山陞
華陽古洞箐樹密携儕伏窟如麇羆山縣十人九人病
擲揄寒熱難撐支寒者層冰安赤脚熱者深甌遭蒸炊
痿癘老穉餘筋骨可憐酷虐無停時地瘠米少邁秋旱
屠羊禱賽紛何為承

天子命來邑土勢不容汝長恣睢脫化蒼鷹除害馬使
者於汝斟酌之東村西塢拾瓦礫半間茅屋非淫祠圖
畫青紅連光彩皂隸走馬陳牲犧葛洪宅傍守藥竈鬱
岡尾後騎白龜潮州刺史毒鱷避文章感通勞毛錐語
罷杲杲上寒日霍然枕上快衮師

時兒
病瘧

寄龔衡圃兼示李分虎朱文盎

分虎詞桀才不踈文盎年少非腐儒向予拄頰說衡圃
其人堂堂文采殊力扛斛鼎好身手大食刀飾青珊瑚

前日見與文盎札楮尾輒及齊僮夫僮夫從來寡拘束
鬪鷄蹴鞠形骸麤老去持節江南北牛馬奔走彊枝梧
每思赫蹠達公子食言多矣洵非誣公子搖膝夜讀書
玉玲瓏閣蒲牢呼此去京華好時節槐花秋雨西勾渠
手擺雷碾盛制作文章鬱律同三都寄君紙扇字瘠竹
氣粗語大胡為乎咄咄文盎嗜痂癖見之大笑容狂奴
琴高山下興不孤莫愁湖上人當壚更語分虎老解事
狂訶爛醉招吾徒

秦郵木瓜酒歌

江南名酒非美酒豈有大醕但小戶蘭陵蜜甜惠泉酸
麴部歡伯不足取秦郵野店木瓜香妙理孤斟索阿姥
老我年來耽飲趣湫澀瓶盆鸚鵡舞油囊五斗載船行
江蟹兩螯可敵虎杜康死去一千年更誰操觚作酒譜

鄭籟八分書詩

我於八分素駭昧瘦硬變化苦不能世有作者傖父耳
觀其下筆如凍蠅大小二篆生一格李斯蔡邕神鬼憑

石經失傳八分絕尚書騎省誰相仍可怪羽人王次仲
化為大鳥如蒼鷹金陵鄭蓋有異骨動腕落翮思飛騰
光和石碑陳倉鼓冥搜結撰無驕矜蛟龍盤挈駕程邈
鑪錘巔顛追陽冰山彊書屋四大字一字真可償十緡
千錢還買澄心紙半束更掃松江綾携歸吾廬掛素壁
黑雲鬱勃紅霞蒸青溪五月天氣熱柳邊水閣深三層
解官已來戶常閉抱書燒藥眠曲肱得蓋墨妙拭病眼
脫巾索酒傾三升

牛首山放詩

老捷骨瘦不服箱小犢肉肥如虎強叢首曳尾日觚觸
兩角對列森開張商飈館接段石岡鞭箠不動勢莫當
老聃騎去數千載庖丁善解來何方戴嵩畫此神揚揚
紛紛大小成低昂我觀茲牛住二日天闕放眼窮八荒
還思棄彼衆駭赫憑風跨鶴摩青蒼

鷄鳴山古寺詩

鷄鳴山寺鄰清涼浮圖三層殿四廂剝蝕破壁蝙蝠大

檀欒深竹狐狸藏瓦墻半欹生綠蘚豐碑巋立連石牀
練兒英雄不可當舌文八字呼蕭郎桓和一戰東昏敗
蓮花貼地堪悲傷暮年佞佛何為者羯磨清淨投空王
以錢億萬贖皇帝羣臣奔走如戲場掘尾狗子自發狂
起自汝陰死三湘縛取老公作寺主青絲白馬來壽陽
麵牲不復延血食酣酣烈火城中央下馬入寺弔陳跡
江鼉吹浪天色黃沈約范雲呼不起徒叅寶誌眠禪房
八夜講室鐘磬寂野風蕭瑟鳴枯桑

彭城曉行

二更三更一驢鳴
牀下寒蟲哀可聽
門外牛鐸響不停
小車軋軋催登程
驛樓打鼓忽四更
十里又聞關柝聲
羣鷄亂叫鴉縱橫
東方垂垂三星林
谷昏黑天未明
里墟人烟是彭城
長年三老來相迎
撐船渡河蒲帆輕
山口曉日銜銅鉦
野店土銼長腰杭
又買餛飩燒蔓菁
馬上可笑一齊儉
年年作客天涯行

朱萊孺寶劍謠

歐冶不死薛燭生步光湛盧今復成陽作龜文陰縵理
赤堇爐火鎔金英我友從何攫異物神鬼呵護蒼龍精
一條觸手弄寒玉三尺出匣聞雷鳴上有蛾眉似太極
中缺黍米如參橫魚腸豪曹不可服莫邪干將誰相輕
須防躍入延津水脫手難縛掉尾鯨蘆中人被屬鏤賜
揮淚為撫桓伊箏蒙莊說此差快意脫置擺落何崢嶸
阿髯個儻才無敵叫嘯不作蒼蠅聲腰間寶此胡為者
填胸礪硯多不平索飲連酌三蕉葉避席捉鼻呼老兵

笑我迂鈍一老鐵鋒鏑百鍊相搪撐年來化作繞指柔
蒼浪秋鬢白數莖少小馳騁不再得只合挂頰逃村耕
修劍挂頰
見戰國策且割瓠肩盡斗酒天曙送爾燕山行壁上吳
鉤照顏色城樓打鼓方四更

高植墓石詩

屯氏河厓秋雨塌中有片石鏗文辭殘闕漫漶不易辨
豕亥魚魯多支離曰君諱植字子建魏濟青相司徒兒
豈是曹家瘞舊物官號封削無臨淄淘洗摩挲搜石尾

下紀年月稱神龜拓跋人代越千載六朝荒碣留今茲
渤海蓀人父名肇北魏高氏從可知宣武當年寵外戚
赫赫權勢何恣睢北海彭城遭毒手朝野側目將奚為
一旦馬側車軸折瑤光尼寺同傷悲十八為郎有令子
六州刺史將軍麾銘辭不識何人作或者傳信非傳疑
瓦棺古墓埋朽骨斜陽逝水流空陂此石一落土人手
磨鏹搗練西風吹我行臨河忽三歎河邊古冢青纍纍
美惡是非不一轍峴首嶧陽各有碑魏收穢史簡編在

考徵僻事方朔饑恨未讀書空涉獵不然幾使究陳思
歎鬚

白鬚不鑷黑鬚折晨起看鏡增傷悲白者凋枯如敗籜
秋風不掃空垂垂黑者似漆才一寸觸手輒去無子遺
賤問天公此何意畲云衰白乃爾宜龍鍾今年四十九
存其黑者將奚為譬彼皺面一村媪朱鉛塗抹形堪嗤
縱使後生輕前輩豈媚年少偷染髭我生憾髭少且短
數根寥落如兔葵最羨鬢鬢毛磔不異脫穎囊中錐

崔琰虬髯劉琨赤叅軍顧盼生雄姿使君彈箏非凡格
謝安坐上誇桓伊于思于思我無分吁嗟兩手揔空顛
畫家為我作小像黑白各半猶參差禿髻蒼顏豈福相
紅泉綠樹非肥癡京朝大官絕妄想防人驕態逃鞭笞
夜夢草檄上鞍馬羸肩斗酒安足辭百戰功成爵列土
坐擁翠袖彈朱絲醒來狂噓遂不睡城樓柝響生涼颼
如此礪礪須澆潑拊擋後車尋酒鷗養生漫假五禽戲
避跡聊作三徑資捫鬚向天三歎息此後黑白亦聽之

身將隱矣文焉用有人閉戶歌虞庠

酒

黃封百壺我無分黃齏百甕我不同有田二頃在西郭
十斛秫米來村中平頭奴子得釀法斗室忽爾成新豐
麴車軋鴉雪水白粥面浮蛆爐火紅七日起看糟牀注
歡伯大手施神通桑落羊羔那足數督郵從事齊發蒙
得此大醕豈小戶封侯萬里夸英雄伯倫之婦太鄙陋
過耳渾如牛馬風十月霜乾木葉脫天邊叫嘯飛孤鴻

撐腸軟飽頗快意百川一吸摩青空奚奴不讓劉白墮
老子本是王無功

題杏村讀書圖為謝員外方山

鬲津之水流潺湲蛟龍抱珠藏黑淵兩岸杏花一萬樹
天風破碎生春烟絲絲寒食跳珠雨片片波面蘸脂錢
土牆茅屋插數椽謝客讀書三十年青蒲白鷗相映帶
花鬚蝶粉日裏纏身如蠹魚穿其穴龍唇樁具牀頭懸
何不拂袖思歸田輸我山薑窗下眠南村老人詩百篇

與君細論長河邊今見此圖一流連為此圖者摹巨然
銅鼓歌為孫給諫樹百

夔牛一響蚩尤空密須答臘聲逢春官蒯桴載周禮
旃檀來自于闐東花奴羯鼓未足數汝陽絹帽插槿紅
誰打細腰騎屋棟宛丘坎坎陳國風可笑阿瞞置鼓吏
漁陽裸體搥三通軒頡冰斯變蚪蚪其馬既同車既攻
好古既少昌黎子作謔須遣東坡翁黃門何處得此鼓
織腰廣首冒以銅雷門靈鼉不合格雕鏤瑣碎煩神工

識者云是諸葛製渡瀘五月真英雄木牛流馬未存一
偏遺茲物音夔夔伏波銅鼓鑄南郡亦曾有此將無同
是否真贋不用辨無妨我輩頭冬烘萬仞芙蓉縛書屋
但使捆載懸當中我摘銅丸扣蜀木聲聞百里和黃鐘
歎息博物張華死考徵僻事方朔窮

元祐黨籍碑詩禽喬子靜

歲在淵獻秋九月我觀元祐黨籍碑灘江石壁搨墨本
摩抄病眼前朝悲三百九人一片石異事作俑何離奇

上書大字八分格畫沙作勢如刀錐左僕射臣蔡京筆
載拜稽首誤此詞文德殿門插笏立徧頒郡國流南陲
司馬諸人半已死禁錮羅織將奚為玩弄皇帝如木偶
青丘九尾雄狐狸雨淋日炙不崩壞六丁雷火無停時
龍巖老洞鑿石壁綠苔碧蘚藏蛟螭嗚呼此豈有鬼守
五百年後長支持猺女狢奴不識字錯比岫嶺山尖垂
盱眙口眼樵其下蜀衣蠻髻獼猴馳玉鷄太史雅好古
七星峯頂搖旌旗斷崖舊刻攬數紙抖擻歸橐我見之

當日蜀洛分門戶，釁端洗刮求癩瘻。膺滂牛李非一轍，東林熹廟堪嗟咨。小人假此竊國柄，謬以黛粉塗牆施。天存此碑復何用，或者當遭朱亥椎。獨有書法絕可愛，摹以玉板揮烏絲。臨川文章更一讀，日斜庭樹鳴寒鴟。粵西山川多瘴癘，九疑六管天一涯。浯溪峴首探陳跡，芒屨竹杖行相隨。

答惠元龍即次來韻

庚申之歲見君面，荷衣蕙帶烏角巾。手中馬撾珊瑚赤。

袖底詩卷冰蠶紋句曲官衙太秋隘江頭兩見梅花新
怪我持節不稱意累君寒餓東野身一時文酒盡豪傑
吁嗟散去無一存君騎蹇驢來夏杪住此又復秋冬春
竹竿小巷類村塢長河圍屋槐當門但有鴨豚插木柵
並無車馬填街塵白蟬穿穴鷄呶啞黃河萬里探崑崙
高詠紅豆詞一闋沉酣傾瀉蒲桃樽朔風吹雪欺衣破
寒如泉溜垂天紳衣材褥段何足道新詩冷艷排冬溫
胡萼澤蒜北食慣庖人羸醜農家貧感君淹留將二載

論文夜半燈火分割羶投轄輒自恥不知何以娛嘉賓
細書赫蹠寄南雁此事說與堯峯人

雪中赴濟南將行韓坡送酒以一瓶置後卓詩

以謝之

秃尾雙驢牽一車兩日二百四十里冒絮裘茸不敵寒
霜林日暮朔風起鷓鴣足滿注麴米春鵝兒殼破試入脣
君酒何殊東野炭煖得曲身成直身

孟東野謝友人送炭詩有直身之語

百門泉上聽雨作歌

我家住在衛泉尾乘興來訪衛水源輝縣城北六七里
十畝一沼如餅盆其土肥厚水清泚中有百竇穿石根
大珠小珠盤渦走粘天拔地流奔渾直向東北入海去
遠從碣石通析津撰杖到此夏五月袒龍不動炎雲屯
振衣千仞清暉閣納涼河朔傾窪樽蒼松古槐立斜岸
禿柳叢竹排當門須臾天漏大雨注空濛瀕洞山無痕
四面風來葛衣冷簷前蝙蝠飛黃昏鹿角關連讀書宅
此水亦到山薑村今日徙倚山水窟新詩美酒安足論

更下太行問濟瀆還探黃河窮崑崙

黃鶴樓放歌

鶴兮鶴兮大江許癯骨俊姿掉毛羽遼海令威何日歸
飛翔下雋宿鄂渚雲夢可吞供稻糧大別當前送風雨
漢川甌川兩岸搖汭口沔口萬峯舞孤立磯頭歷劫灰
熊渠濶狂作砥柱蘆洲窟深盤老蛟羊由浪飛挽神弩
爾鶴不去愛樓居僊棗亭傷藏瑤圃百尺摩空六月寒
赤鼻興亡揮談塵蘋花溪連陶侃宅瓜圻烟接劉郎浦

可惜才人禰正平絕妙好辭題鸚鵡荆峽濤聲半夜來
淵淵似撾漁陽鼓已見周郎破曹瞞更說孫策擊黃祖
憑弔酒傾三百盃敗醬花開滿林莽山高鶴睡寂無聞
漁人一唱嘔啞舫

小孤山

名山廣袤亘百里或千百峯或數峯獨有小孤何挺拔
高標竒絕摩蒼穹大江浩淼中央立亭亭一本青芙蓉
四圍斗壁無路涉懸絙鳥道捫蘿通岩虛半垂石齒齒

梅開將落花重重巔頂一亭小如笠下有佛閣雲腫臃
墊衲拖杖不相識睚眦偃僂走扣鐘入厨煮蕨供客飽
齋鉢餘粒施魚龍倚欄長嘯豁心目八荒四海誰能窮
匡廬當前作屏障五老相向如鞠躬馬當康郎枕左右
彭蠡溢浦連西東江州淚濕白司馬蓮社酒送柴桑翁
神鴉結陣巢嶺背飛栖嘔啞斜陽紅微醺貪眠柁樓底
雪葉颼颼吹寒風濟勝無具還西笑筋衰髮白嗟龍鍾

題胡循齋漢江帆影圖

黃鵠赤鼻天風破秋花亂落江船過萬頃寒烟蒲十幅
兩岸霜楓猿一箇拍浪兒知拜浪婆黃頭齊唱篙師坐
平林短屋以茅縛犇流快船如馬馱有人背手揚其頰
獨立蒼茫吟楚些脫帽狂態似孟嘉險語鬼胆有李賀
我昔曾持江上麾吳頭楚尾塵堀堞皖口傷柂沙鷗圓
瓜步拜風江豚大橙黃橘綠幾經秋青山白石誰相和
今見此圖一惘然空齋日暮情無奈畫手詩思各清絕
山水之遊十日臥雲林端勝米於菟湔手不將寒具浣

雲梯關觀黃河注海歌

章亥不到天墟遙崑崙一竇通重霄漢津初犇坤軸圻
馮夷沃焦紛來朝雍州積石河之首龍門下瀉隨神颺
底柱孟津遶大伾中華沙漠連元枵洛水迤東大陸北
地平土疎山不搖一出伏千萬里大曲小曲風雨飄
濁黃一斗沙居六風輪陣馬無停鑣穎毫徐宿在脣齒
曹濮單鄆排脊腰雲梯古關尾閭地搏桑滄嶼誰相招
來自天上歸地底不知此水從河消三門四折又九派

錫圭之祖烏能祧碣石既沒苦泛濫故道不復悍且驕
白馬沉後無消息瓠子浪湧橫泐寥議築議塞日聚訟
治河治漕羣嘒嘒賈讓賈魯各前席史冊言在作準標
華容武功印川子其人羅立如斗杓關前下馬搜遺蹟
天晴海面拖青瑤洪濤光駛礮電黑齒旗豎龜鼉橋
始悟萬物有歸宿浮生馳逐朱顏凋精衛銜木宅何益
尹公術幻真無聊落日西風透白袷沓連愁聽番禺潮
寄語司空蚤底積山行乘橈泥行橈

赭陽酒民歌戲作

赭陽土風古罕有潘水清甘釀作酒比屋麴米各鬪強
多者百缸少十甌糟床下注鵝子黃味較索郎輒不醜
此風不變已千年傳來疑是杜康後凌晨孤斟帶微醺
出門釀飲呼其偶分曹浮白鮮虛日或三五人或八九
伯倫便埋豈為酣王績之鄉此居首快哉舉國皆歡伯
可惜無螯空左手以醒為醉醉為醒孰好鼓瑟孰擊缶
前年刺史來新官眼花落井印懸肘沉酒一臨聽事堂

簿書置左孟嘗右國人疾趨稱兕觥若予騎馬輿隸走
如此真可博通侯加以九錫賜圭卣我亦逢車流涎者
信宿那能停大斗漫云習俗善移人魯人獵較孔所取
男耕女織何未聞願除麴蘖戒童叟莫教嵇康李白知
老生常談同敝篋軟飽登途太匆匆夕陽在山雅鳴柳

赭陽楚之方城即今裕州也俗善釀矜飲旦起獨酌微
醺出戶遂命侶浮白若予後歸舉國如是終歲無已時
間有醒者羣輒詫異
之其土曠其民貧

古歡堂集卷六

欽定四庫全書

古歡堂集卷七

戶部侍郎田雯撰

七言古詩

晚渡荆江

軌從納納神禹功嶽五瀆四排當中長江浩淼瀆之一
盤勃元氣生洪蒙尾閭萬里注溟海地乳三澁穿脇胸
蟠冢華陽自秦蜀沱潛雲夢連蒼穹熊渠大國撐砥柱
岷川轟怒來磨礮上牢下牢水瀟瀉黃牛峽險浮巴東

南戒直與漢江合洞庭彭蠡支流通沙市城郭籠蜃霧
西塞竹箐藏渚宮石尤激浪勢瀲灩鼉鼓結陣聲逢逢
武昌白帝紛在眼天光霞色搖青紅我來經過駕舴艋
垂堂弗戒行匆匆二更泊船虎渡口柁樓星斗垂長空

三丰道人壁影歌

神仙之說果有無幾見員嶠兼方壺風蟬蛻骨幻術耳
逃名欺世夸清都劉安雞犬事頗怪錢鏗年紀言多誣
漢武不識東方朔祀竈郤老何其愚人生百年五倫重

學仙佞佛皆僉夫羅施自昔號鬼國碧雞金馬西南隅
草木瘴癘山水窟其間或有烟霞徒能經鳥伸訣自秘
寸田尺宅理豈麤地產丹砂大于斗彭亨鼎火鉛汞腴
異哉三丰僿佺侶掣蹋道士羣相呼永樂初載來黔地
巖峨城市吹都虛石鉢流泉清且旨廟砌老桂榮不枯
郭外層巖立千仞忽於巔頂傳形軀勾展顧吳作小照
儼然一幅行仙圖華陽笠子兩芒屨手拖藤杖西方趨
飛瀑直衝入袍袖松花下落黏髭鬚馮虛御風將焉往

何不為我停須臾神留宇宙四大字筆法倒薤非模糊
誰人結構置峭壁巧匠斲削驚天吳始信靈蹤非妄誕
裴回不去坐日晡長生思假六禽戲前村微雨鳴鷓鴣
平越城西山曰倒馬坡坡半見隔山石壁如屏懸崖千
仞上有張三丰仙影首戴華陽冠側身杖策西行分明
可辨翁刊神
留宇宙四字

櫻桃花歌

山城連朝蠻鼓過聲聲催放牛桃花香疑晚梅次第發
榦同老桂參差斜麥英大樹誰手植南榮北牖何紛拏

沾衣風瓣落春雪出山嵐絮生晴霞鶯含烏偷三月暮
火齊鞞鞞言非夸筠籠豈用罽人送渥丹空驗流年賒
官舍岑寂不稱意燕子來社蜂排衙拊擋櫻笋好時節
嘗新爛醉休咨嗟

迎春詩

有序

盛德在木見月令之首頌迎春於郊驗條風之甫至
漢家祀事八佾舞以雲翹唐制春官三省賜來綵勝
東京夢華錄仗擊土牛荆楚歲時書紙裁春燕簇簇

生菜佐餅登盤翩翩風蝶隨花戲鬢弛金吾之禁放
夜人行觀安福之燈踏歌聲滿傳柑插柳樂正月之
良宵麵鹽火蛾徵開元之遺事天津橋上李暮為吹
笛少年漁陽聲中彌衡乃試鼓狂吏雲霄看燈火仙
山法駕垂虹道士之橋夜宴奪崑崙油幕佳賓浮白
將軍之座職方志在所不廢風俗通自昔已然率土
攸同黔風可紀朱樓畫戟高低陣馬風檣玉貌繡衣
千百番童棘女蘆笙六孔吹諧宮徵之音社鼓三通

人作鸚鵡之舞駝頭鳳腦製自苗村鶴焰鰲山擎來
木老火樹星橋之下九陌喧闐木瓜金筑之間百蠻
粧束於高卜歲實維豐年藉此觀風豈非樂土宜春
帖子熙熙蜂鬧排衙寒梅枝頭片片雪飄沾屐扶竹
筇而進酒正值太常之齋舍葑醬以立階喜見鄉儻
之舊鬪雞蹴鞠不比齊風楚風跳月斫牛何嫌鬼國羅
國化行俗美因革莫拂乎人情鑿井耕田昇平總歸於
帝力爰志一時之盛聊當太史之陳

土犂秃速毛頰黃勾芒鴉髻鞭箠長千夫昇舉蜃霧吐
春帖紅膩蠻花張岑牟摻撾次第起立部之伎何堂堂
權輿一隊老農態荷鋤毆犢東作強斜旗大書豐年字
蒙頭草笠腰鶉裳山謠秧語莫辨盱眙口眼羣相將
逐隊結連各變化風檣陣馬神飛揚熨童年紀十四五
朱鉛塗面錦襖襠或彈箜篌弄箏笛或披甲冑揮戟槍
或騎兕象佛子國或鬪珠貝波斯羗壯者壁壘頗與牧
美者嬌冶施兼媼旋風豈類天魔舞當筵不是成都倡

最後一隊更奇絕身輕一鳥空中翔聳尻翹足立肩背
公孫劍器爭毫芒斑文狸走雲旃動游鼃蜒蜿來何方
棹竿嫋索又一隊猱橫狔狻排兩廂邨翁侏儻女猓鬼
搖鈴跳月心顛狂金鍍雙睛銀貼齒假面獅子吟西涼
白樂天有西涼伎詩上句即用白語鍾馗手拍銅綽板擲揄調笑隨白狼
傀儡登場乃如此何年演自宜春坊木瓜金筑接六詔
一髮萬里西南疆山青敢嗟瘴癘毒雪消且喜梅花香
羅施之戲迎春曲放衙觀者如堵牆他時採作黔俗記

蘆笙夔鼓牂牁鄉

柳阮行

麴塵楊柳春三眠風晴絮飛鋪白氈兩山夾岸生野烟
栗留鳴樹何翩翩拖藍一沼清且漣下有萬丈蛟龍淵
批驪下嫁柔絲牽俄頃異物來蜿蜒晦冥雲物紛勾連
神駒生長烏江邊粵昔貢自洪武年載拜稽首蠻王箋
其毛如雪鱗如拳首高九尺花連錢壓沙八斛箭控弦
奚官不用珊瑚鞭天閑十二人喧闐爭誇此馬真無前

天子下詔黃帕纏賜名飛越峯以傳沙苑雲錦那並肩
王毛仲爾將徒然貳師將軍絕可憐西域笑指中郎騫
羅鬼嶺下奔紅泉但餘春水流濺濺按圖索駿空盤旋
老鴉關上斜陽懸臣濂之筆豐如椽高詠更有青藤篇

謁武鄉侯廟

銅鼓峯插城南陂漁磯百尺溪瀾瀾蠻雲作態僵不動
上冒諸葛丞相祠丞相渡瀘來何速綸羽遍歷牂牁陞
祁連未出首南服眼前雍孟如螳蚻九月凱還捷書上

瘴烟漠漠將軍戲遺廟三間塑泥像
有酋帥濟火兒纏頭青布身藤甲
埜花覆額連雙脊毒弩千鈞矢三十
黃區月耳烏蒙驢當時再拜伏道左
聚糗刵路無敢辭焚卒一隊擁前後
乞憐丞相相許之事成配饗英風在
手招羣鬼搖靈旗我瞻廟額三歎息
為謨文字磨豐碑水西黑羅最狡黠
爾之鼻祖何人斯攻心為上術誠善
如公作用良可師千載而下弔陳蹟
石屋深箬藏狐狸長澗潺湲弄寒水
似聽寶瑟彈哀絲四山寂寞秋色老

霜白楓葉紅於脂

碧曉書院歌弔楊升菴先生

有序

楊升菴先生新都才子勝國名臣溯家學之淵源以
正叔考亭自守爭朝端之典禮與君實禹玉同歸父
也解組明農子乃抗辭仗節哀號徹殿陛幾致空朝
謫竄赴蠻荒何愁萬里真國家養士之盛斯臣子守
義之榮彼始以尊親為辭亦曰誰無人父而究致豐
禰貽誚豈繫古有典章在豐嚴亦復何心即張桂不

虞至此歎老夫其耄矣編摩於憂患者七旬望君門
以遠兮教澤則浸淫於六詔酒旗戲鼓流浪餘生剩
水殘山品題到處豐才晉遇著嘉名於蘭臺石室之
編敗壁頽垣留遺跡於蔓草荒烟之際惟箬山先生
采風問俗弔古興懷憶左順門跪伏之秋正高王父
共事之日永言祖德當年之丰采誰同撫此芳蹤先
世之忠貞宛覩恍風流以如昨寧云前代之遙對榛
莽而堪憐尚有毛公之宇人稱并美德固有隣以彼

二百餘人為始為終非無翻覆之手豐坊亦在內獨此西

南荒徼一生一死羣傳激烈之名時滇人毛玉被杖病創卒惟遺

教之在人久立祠以風世山川如故依然爭流競秀

之觀廟貌安存不無世遠年湮之感芟其蕪穢爰復

新之薦以蘋蘩為可繼也地仍雞麓固夢魂所流連

顏以碧峽借題贈之舊額升菴為毛氏別廬曾名之碧峽君子之澤

未斬滇人之慕尤長用綴篇章聿伸仰止

堞風茵露哀牢疆山川瘴癘難禁當新都公子老戍客

孤臣萬里堪悲傷年七十二金鷄杳白頭搖落西南羌

當時世廟議大禮撼門痛哭千夫強仗節抗疏言矯矯

手觸蠶尾投蠻荒

先生云國家養士百五十年抗疏仗節正在今日

程子不作

朱子死今昔濮議誰斟量

先生云臣所執者程子朱子之論

大禮未定

大獄起批鱗折檻空激昂總孽諸人恥同列詎知作俑

來豐坊

先生云學術不同議論亦異臣恥與萼等同列

明堂秋饗復聚訟餘毒

林甫爭拍張

謂分宜也

嗚呼先生遂不返箬苒峒獠羣相將

木弩含沙火雲熱天教老叟紅檳榔吳粉傅面兩丫髻

簪花擁伎何徜徉都盧倒吹潑醉墨焚兒觀者如堵牆
白狼嗷咷烏爨弄百斛文鼎非尋常雷硠光焰留南詔
好手濃煎班馬香

用黃山谷語

我披殘編羅几案如嗅艾納

兼都梁藻采標格稱絕調矧於大節尤堂堂海庄故墟
碧雞麓猩猩白晝啼書倉巾杖逍遙鬚眉古圖畫遺像
生光鋳竹檜一徑夾流水菊乾楓落寒雲僵潮州儋耳
同一轍祠廟翬翬摩青蒼小子作璽自裏縛形骸枯槁
眠黔陽焉得升階更剪紙招魂歸送蠶鳧鄉高吟死去

誰憐句杲杲冬日朝在房

鐵鎖橋

粘天拔地山槎枒下有黝潭
鼃所家捷攫飛鳥不敢渡
莊蹻瞠目空咨嗟巧鍛長絙
三十六東西穿鼻貫石腹
蟠竦屹立體橫陳直使天塹
作平陸

紅酣白糝兩山口蜃霧噴吐
羣峯首畫家能事李將軍
瀾滄江上如斯否縹緲五城
十二樓神山海嶠崑崙丘
拔劍斲空不知險今朝快御
天風遊

清溪行

悲瞿氏也

萬壑松鳴膝六開旌旗風捲清溪隈軍門擊鼓三通歇
番蠻一隊西南來毳幃兩旁森刀戟頰首不動如銜枚
中擁雙鬟好妝束花鈿寶玦黃金釵欲前不前半遮面
一詞未畢肝腸摧雍門之琴子野笛杜鵑啼血何悲哀
自言丈夫土酋長身手長健多髮鬢歲在敦牂構禍亂
天狗墮地聲如雷用昌黎須臾覆巢無完卵吁嗟一旦成
劫灰智伯之頭作飲器客有豫讓胡為哉竄伏棘箐經

五載遺孤那忍遭狼豺天閣夜叫山川走秦庭晝哭神
鬼咤叛兒莫使殺留後孱軀蚤願荒烟埋使者聽之三
歎息淚灑白骨生青苔麾下甲士目眦裂磨刀霍霍爭
喧逐明日驚傳仗節死貞魂何處空徘徊環珮月明招
不得酌以村酒傾樽壘清溪岸上雪一尺山花吹落白
皚皚洞口幽禽太無賴衝風弄響毛毯毳我今作詩紀
其事山蘊潦倒非詩才

東川女官歌

我觀女官如觀畫閭立本繪職貢圖我觀女官如異夢
奇形詭狀非一徒我觀女官入破寺陰風慘淡魑魅呼
古鬼昏燈揭鉢立老佛變相獅鼉趨妖狸髑髏抹粉黛
修羅甲冑吹笙竽雌者青氍毹蓬首雄者碧眼拳髭鬚
女官氣槩偉丈夫火浣大布纏其軀九真藤杖紅珊瑚
金環兩耳垂蠙珠腰下斜挂雙湛盧繡裙拖地蓮花襦
自言年紀八十餘少小生長東川隅通侯爵印大如斗
但有刀劍無詩書爨粳之兒二萬戶牝鷄酋帥風流殊

四海之大環一島九州之外何名區

天子神聖今一統白環銀甕入上都夜郎豈不知漢大
軍門納款非頑愚黔州水西黑羅氏其國邾莒形骸麤
狎獍狔狔不足數傀儡之戲如斯乎

白水巖放歌

九言

我生嗜好與俗殊酸鹹獨於高山流水心饒貪匡廬瀑
布天下稱奇絕何如白水河灌犀牛潭銀漢倒傾三疊
而後下玉虹飲澗萬丈那可探聲如豐隆奮地風破碎

濤如天孫織錦花
藍髮濺珠跳沫
行人衣裾濕雲垂
烟接山寺峯巒尖
小犢出游太真所
不照乖童結隊古
冶豈能殲半紅半
黑飛斗大蝴蝶千
章萬株森十圍松
杉攫猱熊狸鬚髯
爪牙古龜鼉蛟螭
晝夜風雨酣安得
十日五日坐潭上
二三酒侶看月凌
朝暹頭腦冬烘酈
道元未注履齒偏
塞謝客兒多慚解
衣槃薄箕踞於其
側青天搔首我謔
白水巖

送徐諭德華隱還朝

三載選士於其鄉行省使者紛相望遠近正貳次第出
旌旗塞路神揚揚越吳秦楚蜀齊嚴枚東馬各鬪疆
羅施鬼國最瘁陋青山一髮西南羗雨淋日瘦峯巒黑
蛇毒虎猛烟霧黃萬里之遙人所恥官橐不潤無文章
迆迆駟馳此地者輪困瑟縮心悲傷舊例主司下一格
東宮儒臣非職當華隱翰林左諭德胡為擁傳來災方

帝曰人材豈地限咨爾大破蠻天荒烏蒙水西產名
馬九方歟至無遺良先生金篦刮眸子秋鐙夜焰生紅

銚驪珠一串百恠走六丁雷電下取將一榜二十副則
四縱有前後無低昂力挽萬牛嘯風壑斑斑熊豹非尋
常向來異物識者少頭腦冬烘身手僵傾城名姝固希
邁俗好不在真施媿兩年牂牁自娛戲提弄狔狖兼狎
獮苗箐子弟競問字烏言椎鬣排兩廂酷嗜昌歎尋寔
輿間挾糟粕傾天漿先生取士乃如此暗中摩挲爭豪
芒拔其尤者十得五千絲網底珊瑚光京江閣老文章
伯薦之郊廟鳴雷浪漁洋夫子愛奇士見此大叫喜欲

狂如倩麻姑雙鳥爪為爬背癢髯鬚張得人之盛紀庚
午夜郎陣壘何堂堂獨扛鼃文百斛鼎不知誰可相頡
頰奢香驛前馬撾動麻哈江水流湯湯熨兒酒擔青鴨
蹠獠女髻插紅佛桑安得隨風變蓬草凌空北去青冥
翔竹垞山人倘問訊為言老矣田山疆

冬夜與漁村論詩即送北上

霜威折綿風怒號架巖草閣山不牢蟋蟀偪牀鴉驚樹
飛者鳴者求其曹山疆不寐手畫被鰥鰥僵坐然松膏

李子下馬剝啄入大叫索酒何麤豪桑落瀉瓶澆舌本
千百年遠談風騷凌韓轢杜非一格寒蟲謂我如窮郊
受材雄鷲身手健睥睨作者輕鴻毛半夜論詩膽更大
如橫戈稍來磨鏖軒衣張睂弄險怪彌明道士天明逃
瀾滄江深碧鷄聳昆明海上羣峯高竜淙雨過得瑟瑟
袖中秘寶風雷交携來奇文共欣賞千絲結網羅英髦
抖擻蓂茸東歸去馬蹄穿破雲周遭黔地酒具苦無蟹
餉爾槐葉兼冷淘卻憶故鄉此特節春蛆浮瓮雙擘螯

牂牁岸上一相送木脫谷響聲颼颼

送祝山人回滇

昆明道士祝天寧方瞳圓頰長眉青家住碧雞山之麓
閉門日誦黃庭經遠屋萬松十圍大下掘千歲蒼猗苓
葛洪鮑姑同講席坐擁弟子毆神丁石罅流泉清且旨
竹筒竈下風泠泠一日芒屨來筌筑企腳直踏東滄溟
為我淹留幾匝月小駟入市搖盤鈴縱口談天少拘束
大聲訇隱驚雷霆自言讀書學劍術撞鐘吹螺通精靈

曾遇神仙山碕底化一白鶴雙修翎長生辟穀探竅奧
弋者何慕追鴻冥與余鬪飲夜將半墻根倒臥三空餅
是時堂樹戰風雨如拔趙幟下井陘天曙軒轅彌明去
漾漉昉町藏軀形竜頭豕腹破鬼膽雪花一寸埋寒廳

麥秀兩岐歌

山東氓嗜噉硬餅畢羅不托圓且龐百畝之田種麥半
釐牟小大齊耕耒榴花棗花月當午青黃罷亞如馬鬃
冬長夏實此時節壠頭打鼓聲逢逢拾穗兒童結行隊

揮鎌農父交矛縱泥灘之歲際豐稔車篝合選爭來扛
高者齊腰低沒袴昂首忽見燕尾雙天邊雁陳勢上下
月前篁影風磨瀧牢九起洩婦子飽燒畬買犢鳴村厖
帝咨我公鎮齊魯開撫三載張牙幢雨濡臨菑卽墨
國風清鳧繹龜蒙邦表海亘岱誦樂土延精舍露非冥
蠢柜妝餒餽多倍賤膏澤溢似河淮江我亦笙竹領節
鉞於茲遜恧心為降撐腹間讀求哲賦作麴釀酒傾春
缸萬戶摩肩謳不歇小子快舞都盧撞

歷下亭詩

歷下亭子歷山根七十二泉流到門垂楊四圍匝百本
藻紅菱碧波沼翻符簷縛窗似圓笠石子鋪地三重軒
夏木綠陰不可唾鳥語格磔爭唳喧黃鸝顏色絕可愛
啞婉百轉舌莫捫如與佳客坐風榭留連夕話清且溫
此亭撐撐幾千載飽經劫火難具論杜甫李邕不復作
何人北渚傾壘樽架壑嵌巖覲今日蒼木怪石凌朝暎
濟南名士自不少上追騷雅才飛騫華不注峯立東郭

十里直接韓倉村更有邊許號詞桀
擗擋翦紙招吟魂
我思醉眠亭子上溪光嵐影相吐吞
忽忽歲月熟羊腓
移家鵲湖多食言灤頭泉尾尋水派
抽函窮搜鄜道元

長句贈趙生

東坡家有密雲龍黃秦造請朝雲煎我屋
但貯浮蛆甕
小槽滴瀝如春泉趙子登來挑薜戰新露
垂空叫秋雁
前身疑是玉川子餉爾月團三百片

一日浣滌十餘過抖衣初下閣風峯看爾清癯似黃鵠

奇癖由來稱水淫握齷者子須早避不則我背生芒刺
酒熟孤斟米於菟上客重切揖倪清闕

此生能著幾緗履况我髣髴九分白老子何堪賦洛神
空掃鷺溪絹數尺張吳顧陸豈足誇宣和舊譜亦紛拏
獨有趙生真妙手邊鸞蝶鳥黃筌花

簫笛笙管琵琶箏砧杵鈴柝秋風鳴晴絲一闋夜方午
水調愁聽米嘉榮宮商角徵羽相應樂府律呂著為令
願子闌入玉茗堂點竄詰屈聱牙病

茗飲行再示趙生

我昔行役大江北三月曾入三洞遊

三洞六安山名

江村穀雨

好時節小峴

六安茶名

萬樹槍旗抽官焙十斛裹黃箴彭城

一路馱雙牛我生嗜此澆舌本十四年久如朋儔薑鹽

半煎無不可巾箱載楚隨黔州蟹眼日沸彭亨鼎竹爐

葵扇排牀頭煖胃絕勝門冬飲馬卿多病今全瘳蒙花

松護不入口顧渚雀舌真如讐前宵客席啜兩椀一夜

破睡增千憂魚目鰓鰓指畫被酪奴刻毒吾何尤譬彼

結交勿泛濫涼燠不翅薰與蕝水濱小兒應狂喙僮父
捉鼻良足羞聊城趙生善鬪若健翮鴻鵠凌清秋高標
異骨人不識頭綱八餅窮雕搜蒼頭水厄遭嘲哂灌頂
直傾三十甌盧仝之七那足數渴虹掉尾長江流竹竿
小巷鳴瓦雀萍鄉仗爾來封侯老子毀茶唯耽酒十日
五日眠糟丘與子劉項不相下堂堂壁壘分鴻溝屯氏
河水黃泥濁不知何水堪置郵當此紅蓼白蘋夕木葉
瑟瑟風颼颼勸子且同劉白墮鐙前爛醉商聲謳

種瓜行贈韓坡

韓坡種瓜不一種瓜熟摘得千百筐小者斑青成行隊
大者蒼蠹排兩廂河村連亘十餘里騎驢打門來拍張
自誇其瓜美無亞東陵五色非尋常十字巷中浪花少
椰子萍實皆僉荒耒耜經與齊民術此事久書於左方
一般更有西洋種剖之如乳傾壺漿子面有紋細於髮
蒼頡鳥篆爭微芒雨後纍纍歲豐稔扛來送與山薑嘗
日正卓午縱饒口撐拄蟬腹兼龜腸面上堆塵苦炎熱

御風濺齒生清涼似與高士共晨夕紅泉綠樹心徜徉
明年我亦學老圃犁鋤自操身手彊與君入山稱瓜隱
徒駭水上歌滄浪

清涼寺雙檜歌

清涼破寺古佛國中有雙檜幽可探癸酉九月念六日
厭次老子來城南初出城門霜信冷沙土數尺堆峯嵐
忽聞午鐘蒲牢吼山門赤腳頭陀叅維摩庭院十笏地
獅子倒座羅什憨亭亭二本東西立西者兌女東震男

秦灰漢壘幾千載鐵皮虬幹何耿耿一如巫支鑠波底
太陰黑入蛟龍潭一如晉鄙遭朱亥右肩偏袒毛毯毯
一則根生醜婦癭一則枝縮甕繭蠶雷雨垂空礮礮走
脂澤伏窟豨苓甘夕春在瓦西風起鈴鐸乍響天蔚藍
須臾淮陰拔趙幟井陘戰士旌旗酣又如蚩尤排奇陣
鬼兵十萬橫長鈇下有艾納大如掌石牀花掃飛鉢曇
四溟山人何為者詩篇曾不一咀舍我今留連不肯去
韋偃莫繪心饒貪安得移甬山薑屋兩手一日摩挲三

乾竺先生視之笑捫蝨且與殘僧談暮歸烏尾訛樓角
寒廳彌勒眠同龕

雙節詩

閩嶠理學推曩代大雅可繼寧無人文章節烈本一轍
識者須別偽與真延平不作考亭死語錄斷爛芻狗陳
盜名取位攫竒貨俗子哆口空信信屠門大嚼恣快意
詎知六籍非荒屯建安夫子東甌傑吾道南矣誰等倫
讀書三十六峯下撐摺忠孝名儒醇吁嗟海邦構禍亂

慷慨綿谷大義申况是眉案雙魂古遺書壞壁銜青燐
理學有如先生者乃可俎豆追先民不爾黃鷄鬪嘴距
如病吟嘯搖齟脣平日吹竽觴已濫高譚水樞與風輪
凌程轍朱自矜喜黃口小兒加冠巾一旦盡露假狐面
魯鼎贗質何遭迤乾叢納納九州遠先生竒節高嶙峋
火續薪傳幾千載不將斯道理荆榛我一補歌當槐序
雨注簷溜垂天紳

題龐雪崖像

水曹郎是詩人例何遜杜甫張籍徒才地須與位置稱
冬官自昔無僮夫龐子作詩似水潑波濤萬頃犇江湖
放衙脫帽飛虎僕空堂風雨虹蜺趨鴻篇富排十餘卷
萬口傳誦填京衢莫怪氣豪言語大鐵如意碎紅珊瑚
三日新婦何窈窕漢庭老吏非枝梧元人評語近代有如
此作者蒲牢聲與蛙蠅殊畫上苦吟少暇日荷衣蕙帶
道貌癯甘遜橫目二足子面團肥白如瓠壺山蘊老嬾
識人寡刮眸金篋披此圖梅花爭開春晝煖翠微峯頂

金定四庫全書
卷七
烟光鋪與子旗亭鬪句出城去鞭絲笑指黃公壚

題殷彥來周策銘詠李翹詩後

昌黎硬語淮西碑玉溪好手韓碑詩僕射殊勲今已矣
千載而下空文辭三十六體西崑艷儷偶隱僻矜瑰奇
獨此曲終間奏雅似聽鈞樂彈朱絲睥睨昌黎不多讓
湯盤孔鼎同攀追文章有如二公者兩雄力拔將軍麾
夜擁甲兵十四萬直入蔡州昏黑馳戎戎滕六沒馬槊
鶩鳴亂叫寒風吹元和冊功留陳跡讀二公作如見之

平淮巨雅柳州筆文兼風頌格不卑漁洋山人雅嗜古
羣賢北面稱吾師入座舉舉江南子張軍奮臂來搯頤
各以健才從大帥前鋒唐鄧搖旌旗投我新篇聲剝啄
鷹門奴子縮凍龜雪葉掌大深半尺我方向火煨蹲鴟
把詩朗吟過一日連傾數斗玉練槌

送馮敬南之任梧州

紈袴喜馳裘馬場吾徒耽入山水鄉山水之窟六千里
摻攬竒僻來蠻荒離家尺地輒自苦張騫甘英豈癡狂

人生不作白翎雀，檠株北地毛羽僵。我行未躡西粵屐，
但聞脣齒鄰夜郎。其水沉黝狔螾穴，一髮江通戩歌彊。
其山斑斕石五色，雨晴白綠赤黑黃。馬援廟連烏熊館，
虞舜祠隱紅佛桑。枕榔樹下蚺蛇醜，盱眙伸縮來何方。
好奇之士快一覩，蟲魚爾雅增數行。馮子牽絲正年少，
蒼梧擁傳神揚揚。韶濩遺響擊銅鼓，猩狖人語擔椰漿。
午衙吏散飛虎僕，飲酒一石詩一囊。雄文非此地，不出
定排幾卷新篇章。監州有蟹願更愜，絕勝西笑顏山薑。

老矣嗜好百不用土物遠道還相將
二三瓦盆畝末利
百千葇葉包檳榔

臨漳縣懷古

鷓鴣陂上日將暮楊柳津頭行人渡
欲雨未雨雲出山
半啼不啼鴉入樹
亶甲當年故都空
漳河濁水亂流中
人言老瞞銅雀陋不及石虎九華宮

太行山歌

太行山為天下脊
幽州河內如游龍
天瀉黃河直截斷

重岡疊阜紛相從，濟源之北更秀拔。二十五里三高峯，下有奔流勢迅駛。不知何物來蹋躅，云是神鰲伏地底。巖巖莫動無其蹤，小縣孤城壓背腦。枕石面水諸侯封，車輪摧折羊腸坂。苦寒吟眺何龍鍾，我今擁傳孟門道。手把長劍曳竹筇，直上此山絕頂望。西揖恒霍東岱宗，魏武苦寒行北上。太行山艱哉，何巍巍。羊腸坂詰曲車輪為之摧，韓退之詩是時新晴天井溢。誰把長劍倚太行，衝風吹浪落天外。飛雨白日灑洛陽。

王屋山歌

王屋之山山不孤峯巒秀矗羣山無山椒瀝淪地肺
潛伏巖腹如跳珠吹散濟瀆天井溢千里萬里溟渤趨
其源既接流不濁泥沙六斗胡為乎廟前老松聳千尺
蒼蒼孤上同清癯山高水澄兩奇絕樹木暄萋冬不枯
黃精藥苗松火煮中有羽客栖方壺周迴清虛洞天濶
陶君真誥言語麤我家住在濟水尾持節祀瀆神鬼俱
孟門太行到眼底向城軹關徒區區盧仝不作岑參死
更有何人來清娛日暮憑衿自吟賞泉聲不斷山禽呼

北邙山歌

黃河之北孟津野土石礪山之下千年伐盡漢諸陵
可憐故物無石馬溫洛東流翻日車洛神何處烟波斜

行人日暮輓轅道春風吹落北邙花

春秋說辭曰洛之為言繹也水繹繹

光耀也先儒言洛居天地之中其氣晏溫故曰溫
洛李賀詩華清源中砮石湯徘徊百鳳隨君王

輓轅關放歌

輓轅關在二室之間縱氏縣東南左傳晉欒
盈過周王使候出諸輓轅獻帝春秋曰車駕
出洛陽自輓轅而東楊奉韓暹引車追之即
此管子地圖篇云輓轅之險房玄齡注云謂

路形若轆而又轆曲緱氏東
南轆轤道是也緱氏今偃師

五丁神力齊鬪彊二室鑿破森開張宏甯洞壑立門戶
下疏洛水奔洛陽車馬不從此地入途迷七聖風沙黃
轆轤關自何代始崎嶇犖角迴羊腸石子大者似石困
小者彈丸如珠光禹行治水錯伐鼓塗山氏女來相將
野語創自淮南子搜神述異何譎狂五乳峯嵐但咫尺
山椒神瀆紛低昂三素雲涌駁霞漏吹笙王子摩青蒼
天邪桃花路側塞翠坑天棘排兩行驚瀧聲搖緱氏嶺

匹練飛下金牛岡白髭老子游嵩客八風四扈來徜徉
春山淡冶迎人笑燕子戴勝鳴村菊便與洪崖採藥去

手抄术序長生方雲駢一駕羣靈接上朝三十六玉皇

用李賀語陳希夷詩倏爾火輪煎地脈愕然神漢涌山
椒列子言神漢即易所謂山澤通氣也入道秘言曰春
日有三素飛雲四扈四時鳥也皮日休詩白日半窗抄
术序清泉一器授芝圖李賀詩曰為君持此凌蒼蒼上
朝三十六玉皇李白詩三十六帝欲相迎仙人飄翻下
雲軒唐張泌詩溪風送雨過秋寺澗石驚瀧落夜潭

盧巖瀑布

兩山忽張匹練垂欲斷不斷天風吹下注澗壑如奔馬

山根搖動駭鼓椎泉石膏肅那可假須尋佳處結茅舍
為語吾家老游巖同來觀此瀑布者

桐栢山歌

蜿蜿蜒蜒桐栢山別有天地非人間

用昔人語

胎簪大復名

不一重巒疊嶂垂青鬢上有老童伏其窟水痕破碎流
潺湲神禹導淮經此地胝胼橈橈何時還祖逖避家數
椽屋巖花亂落燕支斑濟勝無具凌絕頂望之不見心
迨攀琵琶石門拱揖立唐鄧淮蔡排天關萬本桐栢十

園大參天鄣日蒼皮殷却思混沌何年植彌漫澗谷不
可刪杜甫李白屐未到詩才薄弱吾慙顏向夕揖山登
車去山禽相送聲綿蠻

香鼠歌

產密縣荒山石孔中隨水流出出輒僵僅餘
枯髮猶完鼠形樵人偶得之不恒有也其輕
五銖其氣如蘭置巾
箱內香經年不敗

千百年後無張華陸璣羅願書幾家咄咄怪事密國鼠
誰其識者空咨嗟可笑竇攸治爾雅足跡不到溱水涯

神丘古穴產異物豹文五伎奚足誇石隙竄出即遄死
兩耳尖似雙髻鴉飛鷗竹鼯恥為伍乾枯不壞皮與牙
腹藏艾衲號璞尹寧馨兒子形天邪詎意河東相州輩
臭味可比幽蘭花疑是公房昇仙去不隨雞犬來爬沙
三釁三滯腸自吐景公之社慚紛挐盜肉爰書早知避
飲河潔體良堪嘉人賢不肖譬諸鼠千里豈但毫釐差
長吉練香薰宋鵲昌黎蝕月吟蝦蟇我作長歌歌香鼠
敢同冰柱兼雪車

十二連城歌

連城城北十二城村墟草木皆甲兵舊鬼磨滅三百載
天陰雨濕青燐生當時靖難戎馬作旌旗斜掩安陵郭
五十萬師自南來方山之麓捲秋籜燕雲黑壓金川門
齊黃二子徒紛紛濟上猶傳鐵太守白溝空恨李將軍
衰柳殘陽長河古鴉陣障天不可數蕎花豆葉爭秋風
平蕪迸落戰場土

聽毛會侯彈琴

儒林丈人毛公者世上但賞幼婦辭不識雅音在腕底

搬弄十指彈朱絲蝸牛廬小天宇空上聲黑鴉三五紅霞

垂公停馬過卷袍袖澗泉犇落松風吹十三徽老蛇虺

古領畧宮徵生新奇水仙操響第二段天女花散神珠

馳山林杳冥海水立成連下駕斑文狸我面摒擋十年

土鼻堊浪斲無不為笙箏箏管琵琶笛兩耳一旦湔洗

之奴子燒鑪供茗事軒轅石鼎來吟詩城角殘日如沒

鶻風雨搖樹鳴旂索我作歌學東野何苦聽此寒蟲

悲

題毛會侯畫

我生泉石膏肓流每于畫上尋壑丘少文當日眠可遊
未云看畫風馬牛世無摩詰與虎頭毛公前輩王顧儔
千峯聳宙十二樓怪松萬本風颼颼半空天紳林杪投
下跨畧約犇厓浮一老蹲澗如獼猴手搖竹竿魴鯉求
柳花纂靡莎脂柔欲鳴不鳴數粟留作者似誇山澤幽
使我神動心已猶上題數字風格道屈蟠紅印銜雙虬

挂之素壁何焱攸藍陳蕭憚翁人羞吾攫此畫生清謳
不異美酒逢新蕪醉鄉城郭今封侯山薑欲歌能決疣
摩挲隄防寒具油

送丁郎中守重慶

老大郎官無一錢一麾出守堂堂去回看瑟縮白雲曹
二三舊侶愁吟處尖峯萬點烏江斜百蠻社鼓鼙鼙過
春來絕好巴渝景杜鵑鳥與杜鵑花

送毛郎中守思南

金史口... 卷七
詩人出守思南行一髮青山宛在目蠻村絕少紅白苗
春聲愛聽巴人曲紀程才過雄渠邦采風已到犂犂江
峯腰蹀躞驂騮五樹杪高下旌旗雙

送朱郎中守貴陽

夜郎怪雨盲風地如何重作夜郎客烏羅倘詢舊使君
為言雙鬢已全白太守風流春晝時遨頭結隊張水嬉
木瓜村鼓竹王宅鴨蹠蠻花丞相祠

棗花寺集飲漫賦長句送徐華隱學士歸里兼

示公凱西厓兩翰林

棗花古寺城南隅，老槐聳幹三兩株。
髻絲禪榻羅酒徒，如載舴艋行五湖。
柳陌春風吹我過，紅叱撥躡草痕破。
休言席上無管絃，羣鶯亂啼燕子和。

齋厨竹徑松風鳴，簷前烹鼎魚眼生。
曲几蒲團澆舌本，野桃枳落花縱橫。
李湯才傑盛文藻，摩壘高嘯動林鳥。
邠許一局賭宣城，令人空憶羊玄保。

佛閣風鈴忽自語，井柵柳綿還爭飛。
堂上一聲鳴午磬。

花下蛺蝶來依依跳丸詎傷羊脾熟回首廿載長安陌
痛飲須進三百爵送爾將歸未歸客

公作詩史敵董狐誦之纍纍如貫珠老我客心似頭痞
得此一日三爬梳行李家具何瀟灑寒蟲淒響比東野
秋風我亦歸山東訪爾橙黃橘綠者

湖上書所見

天光動搖湖光破人行湖曲蟻旋磨斜陽官柳可憐生
黃鸝無語燕子坐十里東堤又西堤五里深溪復淺溪

寶馬躡莎金匱匣秧田行水木馱馱

小忽雷歌 有序

南部新書載韓晉公滉入蜀伐奇樹堅緻如紫石遂為兩胡琴名大小忽雷後獻德皇樂府襟錄云文宗朝兩忽雷猶在內庫內人鄭中丞特善之訓注之亂始落民間孔博士東堂得自燕市蓋其小者名二絃琵琶

馬之上樂琵琶耳忽雷大小何以名大者潛避蛟鼉窟
小者飛作霹靂聲曲項錦纏二尺短上絃下絃雌雄鳴
南部新書載此語羌笛筓篥不足數云是韓滉入蜀時

匠斤巧斲蜀川樹臣滉牋進德皇朝內庫中丞翻六么
訓注之亂如敗葉落日沒鶻風蕭蕭臨潁弟子好顏色
法曲妙舞世莫識玉貌繡衣今白頭教坊供奉淚沾臆
况此零散八百年鳳尾檀槽真可惜當日女官盡能彈
花下二絃誰第一孔生東堂邀我歌青衫司馬奈爾何
玄都道士倘相訪鄆州還憶樊花坡

予於丁丑四月同
天壇高鍊師聽樊

生花坡彈小
忽雷入調

題武則天夜宴詩卷後

金輪皇帝雌之雄武成殿上非龍鍾塗澤髦狀兩玉手
搖筆脫腕如飛鴻結撰陸離十二字直使上古蒼頡窮
狄薛臣輩驚竒絕載拜稽首三呼嵩是為萬歲通天帖
天樞頒出通天宮錦背真蹟王方慶入朝牋進光戎戎
硬黃搨本藏內府以鐵作柱盤銅龍此卷夜宴栢梁製
墨也書法何其工折釵渴峴世莫覩流傳散落隨東風
皖江中丞攫異物好古什襲巾箱中示予觀之天正熱
摩挲病眼頭冬烘上連八頁麥光紙下蟠虬印燕支紅

嗚呼李氏祚移操奩具復弄十指相磨礮胡弗并付明
堂火豕立人啼神鬼攻宋代蘇黃少跋語卷尾樹禿山
髡童庚辰六月題長句烏絲行墨嫌匆匆

佛手柑歌為王幼芬太史

太倉太史來江南十頭投我佛手柑輪囷磊落堆瓦器
晴牕一日摩挲三其一綠甲如么鳳其一黃面如瞿曇
一張老拳蠕蠕動一挽短袖牙鬚酣一如恠石虎豹首
一如癭婦兩耳耽大者四輪牽跛象小者飛乳呼千男

更有二柑似青玉香鉢迸裂生烟嵐提羅花放乾竺種
獅子尾掉如來驂橘橙流輩多數指草木之狀窮嵇含
空王合掌偏伸爪妙理須待靜者叅太史擁傳夜郎國
珊瑚鐵網心無慙陸賈行騰少長物但有豐筆同長鏃
蒟醬檳榔可輦載獨擔此物雙筠籃山薑衰白今于役
日煨淡粥餐魚泔壯不如人沉髦矣強將萬里崑崙探
髻絲禪榻維摩病夜來彌勒眠同龕遭汝艤船河橋下
造門聊慰七不堪旃檀襟抱莫輕別渭城邠復歌何戡

洪澤湖大風雨歌

庚辰七夕

沛沛磴磴洪澤湖荒荒納納龍所都十六巨鰲戴地底
老蛟波面行頭顱太乙陰精不解事弄此伎倆狂且迂
四海之外復四海禹益撰著言非誣何不移住扶桑窟
偏安盆沼徒區區胎簪巖腹一勺耳七十二派羣相呼
尾大不掉勢東瀉如奔萬馬長馳驅歲當丙子祀桐柏
旌旗十道唐鄧衢入廟拜宣

天子詔道士伐鼓吹笙竽神顏白晢踞高榻赭袍皂幘

卷鬣鬍鬚列水官擁水卒身材生硬形骸麤翦紙招神
酌以酒次及兩廂東西隅我來淮南似舊識河梁本與
新交殊老子峯頭日將落澗灩晴色紅霞鋪拄頰清吟
恣眺望幾行垂柳鳴千鳥黑雲崩壞西風起五神車下
鞭石趨譬彼將軍拔趙幟怒颺鏖戰虫尤符浪鼓湧礮
茅屋破渴虹飲盜飛天吳奮隆拔地雨大作天漏曾不
停須臾蝦蟆登床狐晝語陽侯作意嚇腐儒長屎誰其
畝樓殊荆山潼沓事有無杞人抱憂胡為乎蒼水使者

多良圖郎顛不用生嗟吁王褒九懷空嗚嗚噫嘻王褒
九懷空嗚嗚漢代陳登真丈夫

中秋對月放歌

完完白盤升天東翦羅參斗垂當空照徹四海復四海
清虛一道冷天風天荒地老月已古年年不停修月斧
吳剛斲堊媿郢材枉勞八萬二千戶李白原來是酒人
白詩舉盃邀月飲對影成三人謝莊下筆如有神但知庾亮登樓好愁
殺盧仝蟣蟲臣寒杵無聲露華重秋來搗藥嫦娥病何

人吹笛怨楊柳有客打鼓騎屋棟鶴欲舞分雁可憐搖
落長吟秋水篇淮南無限關山淚灑向小山叢桂邊

題王瑁湖宮簷下直傳經圖

一郎長大神清臞一郎方瞳風骨殊一郎白哲美丈夫
一郎文采如於菟束髮受書堂下趨珊珊來前堂上呼
一郎少小紅羅襦年紀五歲肥瓠壺老翁放衙日已晡
四腮飽噉江鄉鱸風晴花煖滿座隅野鶴一隻松二株
五郎駿姿五駒駮天驥生出龍梭駒六經纍纍口貫珠

河汾鄴下多生徒
它年齊騁康莊衢
老翁之樂如斯乎
山薑兒子痴且愚
小者黎棗大猶羸
淵明曾此生嗟吁
盧仝衰暮添丁無
羨公下直傳經圖
觀圖摹捋白髭鬚
冬夜陪漁洋飲卞
令之少司寇齋中
聽小伶度

曲令之出吳道子畫維摩像索題

絳帕蒙首皮肉肥
跣躄西行何所歸
名藍精舍麥光紙
道場不見天花飛
云是延陵道子筆
弟子翟琰為布色
病骨枯龜絕不似
維摩變相人豈識
欵冬樹下欲雪天

來上米家書畫船清歌妙舞一小鬟新詞鬪向旗亭邊
逃禪端不受禪誤毘耶長者與我語坐圍紅袖寫烏絲
便是優曇香散處

西山行為張蘧若侍御

神丁電火虫尤風朱亥椎響聲隆隆狐狸魑魅何處避
鼓神冒首千山空西山遭澆將百載貂璫臭骨今何在
楊左之魂不可招碧雲寺古滄桑改燹廟遺事邠堪論
山椒空有寺人墳遙岡景陵一塚土柿林寒葉秋紛紛

張公上疏真御史驄馬騎來行且止試看翠微風雨過
一鷲橫飛夕陽裏

長句送慕給諫見曉

歲在辛巳十一月戎戎漫天飛雪花盧臯欲渡不得渡
犖确塗汭寒風斜荆高酒市筑聲苦行旃結束天之涯
于思于思睥其目稜稜面貌如削瓜云到江鄉獻舍住
林屋峯頂餐烟霞從來盪札恥涎譚不學風蝶隨夫邪
自言偕儼太草草賤臣蟻蝨無咨嗟曼倩饑毆金門侶

長孺出臥淮南衙行年五十頭未白手持如意空中搗
霜威折綿被似鐵小店鷄唱擔夫譁羊裘裹縛策驢子
四蹄僵凍還爬沙老我送君且自送連夜歸夢何紛拏
燭跋三寸虎僕歇西隣破寺啼神鴉

長歌題四女祠

貝州破廟河之厓古鬼冷守昏燈斜殘碑牆根泥甃沒
一株禿柳喧啼鷓塑像四女儒巾怪土人香火疑神鴟
云是學士宋女宅尚宮逸事今堪誇饒州司馬廷芬父

其母黃媼雙髻了鐘魚晨鼓夜不歇翁婦上坐如官衙
唐書女五祠列四千年休訝傳聞差讀書恥學蛾眉嫁
鬢上不插牽牛花歷事三朝掌圖籍先生官號何清華
訓注之禍憲賜死茱萸少一空咨嗟伊喔北鷄已數唱
柔條武媚哥聲啾婉兒韶警文章手通天陳迹悲淫哇
女論語成匹七誠較十二字真天邪清陽巾幗擁才傑
世間男子徒紛拏自是詩人延清裔紅袞散落天風葩
豈料當年嘲口臭才歸粉黛馳香車低回長揖上馬去

祠門社鼓鼙鼙過

鬲津草堂觀劇放歌

七十老翁何所求日拚枕麴眠糟丘不則玉貌繡衣兒
璿瑜鋪地舞且謳兩翁絲竹聒兩耳琵琶簫管箏篴篴
鬲津草堂夏五月蒨蕪豨首草樹幽忽爾袒衣瀉盃葷
忍冬花釀如黛髯姑射仙人自何處驚鴻迴雪駕赤虬
雙鳳口銜紅綬帶蛾眉長袖天風遊段師之絃花奴鼓
真珠一串歌不休小秦王曲翻水調黑鴉三五斜陽收

昔人作俑旗亭夜汗頰畫壁心已猶是時小鬟不更唱
詩名甲乙良堪羞我但飲酒驅百憂吁嗟白到十分頭
今日之樂有如此世間萬事風馬牛七十老翁何所求

蘇祿王畫像歌

狸睛戟髯鴉色袍烏帽紅帕螭龍交山柶雕弓鶴翎箭
珊瑚寶玦大食刀禿襟短裊擊鼉鼓猙獰恠狀真鬼豪
兩翁丁丁兩海女西施鄭旦雙妖嬈一挿雀釵露粉面
一調鸚鵡衣冰綃左者拖帚捧玉斗右者晞髮吹秦簫

云是蘇祿巴都像澄心堂紙魂逍遙畫工顏得乃大手
虎頭道子揮斲毫于闐迤東六萬里青山一髮中原朝
永樂皇帝受琛貢何殊南楚來包茅我編破浪送之去
天吳拔地空中逃滄嶼茫茫掉其尾魑魅大小羣相招
天津敗荻弔蟋蟀衛河崩岸鳴鷓鴣廷臣奏牋謚恭定
賜以玉篆沉烟壕詔葬鹿角築馬鬣碑碣堂廡蒼山牢
是時景隆罷酣戰連城十二圍週遭荒壘遺鏃夜月冷
顏沙奔馬寒花飄過者貫酒澆抔土火珠迸落華表高

五魚金盃在何處當年性命輕鴻毛
余觀此圖生嘆息
村原禾黍風蕭蕭

苦雨歎

五行之志昔曾誦郎顛高談賈生痛咄咄
天漏何術塞
商羊隻足向人哢豐隆奮地火欲流羲和
停行轡不動
鼃鼃鼓鬣來堂坳蛙黽鳴股上屋棟甑口
釜底爨烟稀
婦子抱泣老農哄夏憐四壁千邨無秋傷
五穀八月空
去天一握綠章聞長吏低回官牒送行野
愁踏土木灾

硃牒限比官糧重賣犢鬻女充衢衢百錢斗米堪作貢
河伯雨師亦常職跋扈飛揚太豪縱長庾告瘁澤門替
鸛鶴跣跣究何用羊盤烏橈莫嗟咨秋雁一聲燕麥種
汚邪甌窶破豚蹄朝元高閣鳴鐵鳳



古歡堂集卷七